

四庫全書

史部

欽定四庫全書

史部
明史卷三百三十一

郎中_臣丁雲錦覆勘

總校官編修_臣朱鈴

欽定四庫全書

明史卷三百三十一

大學士張廷玉等奉 敕修

列傳第二百一十九

西域三

烏斯藏大寶法王

大乘佛法王

大慈法王

闡化王

積善王

護教王

闡教王

輔教王

西天阿難功德國

西天尼巴勒國

朶甘烏斯藏行都指揮使司

長河西魚通寧遠宣慰司

董卜韓胡宣慰司

烏斯藏在雲南西徼外去雲南麗江府千餘里四川馬湖府千五百餘里陝西西寧衛五千餘里其地多僧無城郭羣居太土臺上不食肉娶妻無刑罰亦無兵革鮮

疾病佛書甚多楞伽經至萬卷其土臺外僧有食肉娶妻者元世祖尊帕克斯巴為大寶法王錫玉印既沒賜號皇天之下一人之上宣文輔治大聖至德普覺真智佐國如意大寶法王西天佛子大元帝師自是其徒嗣者咸稱帝師洪武初太祖懲唐吐蕃之亂思制御之惟因其俗尚用僧徒化導為善乃遣使廣行招諭又遣陝西行省員外郎許允德使其地令舉元故官赴京授職於是烏斯藏攝帝師蘭戩巴藏布先遣使朝貢五年十

二月至京帝喜賜紅綺禪衣及鞮帽錢物明年二月躬
自入朝上所舉故官六十人帝悉授以職改攝帝師為
熾盛佛寶國師仍錫玉印及綵幣表裏各二十五人製
印盛帝眎玉未美令更製其崇敬如此暨辭還命河州
衛遣官齎敕偕行招諭諸番之未附者冬元帝師之後
索諾木戢巴藏布元國公格埒克斯戢藏巴勒藏布並
遣使乞玉印廷臣言已嘗給賜不宜復予乃以文絳賜
之七年夏佛寶國師遣徒來貢秋元帝師帕克斯巴

之後公噶勒藏巴勒藏布及烏斯藏僧達爾瑪巴拉遣使來朝請封號詔授帝師後人為圓智妙覺弘教大國師烏斯藏僧為灌頂國師並賜玉印佛寶國師復遣其徒來貢上所舉土官五十八人亦皆授職九年達爾瑪巴拉遣使來貢十一年復貢奏舉故官十六人為宣慰招討等官亦皆報允十四年復貢其時蘭戩巴藏布已卒有僧喀里瑪者國人以具有道術稱之為尚師成祖為燕王時知其名永樂元年命司禮少監侯顯僧智

光齋書幣往徵其僧先遣人來貢而躬隨使者入朝四年冬將至命駙馬都尉沐昕往迎之既至帝延見於奉天殿明日宴華蓋殿賜黃金百白金千鈔二萬綵幣四十五表裏法器裊褥鞍馬香果茶米諸物畢備其從者亦有賜明年春賜儀仗銀瓜牙仗骨朶魷燈紗燈香合拂子各二手爐六織蓋一銀交椅銀足踏銀盆銀罐青圓扇紅圓扇拜褥帳幄各一幅幢四十有八鞍馬二散馬四帝將薦福於高帝后命建普度大齋於靈谷寺七

日帝躬自行香於是卿雲甘露青鳥白象之屬連日畢
見帝大悅侍臣多獻賦頌事竣復賜黃金百白金千寶
鈔二千綵幣表裏百二十馬九其徒灌頂圓通善慧大
國師達實布嚕克格埒克斯等亦加優賜遂封噶爾瑪
為萬行具足十方最勝圓覺妙智慧善普應佑國演教
如來大寶法王西天大善自在佛領天下釋教賜印誥
及金銀鈔綵幣織金珠袈裟金銀器鞍馬命其徒布隆
巴幹桑爾結琳沁為灌頂圓修淨慧大國師高日幹沁

布為灌頂通悟弘濟大國師科爾羅格埒克嘉木藏巴勒藏布
為灌頂弘智淨戒大國師並賜印誥銀鈔綵幣已命哈
里瑪赴五臺山建大齋再為高帝后薦福賜予優厚六
年四月辭歸復賜金幣佛像命中官護行自是迄正統
未入貢者八已法王卒久不奉貢弘治八年王噶爾瑪
巴勒始遣使來貢十二年兩貢禮官以一歲再貢非制請
裁其賜賚從之正德元年來貢十年復來貢時帝感近
習言謂烏斯藏僧有能知三生者國人稱之為活佛欣

然欲見之考永宣間陳誠侯顯入番故事命中官勸允
乘傳往迎閣臣梁儲等言西番之教邪妄不經我祖宗
朝雖嘗遣使蓋因天下初定藉以化導愚頑鎮撫荒服
非信其教而崇奉之也承平之後累朝列聖止因其來朝
而賞賚之未嘗輕辱命使遠涉其地今忽遣近侍往送
幢幡朝野聞之莫不駭愕而允奏乞鹽引至數萬動撥
馬船至百艘又許其便宜處置錢物勢必攜帶私鹽騷
擾郵傳為官民患今蜀中大盜初平瘡痍未起在官已

無餘積必至苛歛軍民鋌而走險盜將復發况自天全
六番出境涉數萬之程歷數歲之久道途絕無郵置人
馬安從供頓脫中途遇寇何以禦之虧中國之體納外
番之侮無一可者所齎敕書臣等不敢撰擬帝不聽禮
部尚書毛紀六科給事中葉相十三道御史周倫等並
切諫亦不聽允行以珠琲為幡幢黃金為供具賜其僧
金印犒賞以鉅萬計內庫黃金為之罄盡敕允往返以
十年為期所攜茶鹽以數十萬計允至臨清漕艘為之

阻滯入峽江舟大難進易以舳舻相連二百餘里及抵
成都日支官廩百石蔬菜銀百兩錦官驛不足取傍近
數十驛供之治入番器物估直二十萬守臣力爭減至
十三萬工人雜造夜以繼日居歲餘始率將校十人十
千人以行越兩月入其地所謂活佛者恐中國誘害之
匿不出見將士怒欲脇以威番人夜襲之奪寶貨罷械
以去將校死者二人卒數百人傷者半之允乘善馬疾
走僅免返成都戒部下弗言而以空函馳奏至則武宗

已崩世宗召允還下吏治罪嘉靖中法王猶數入貢迄
神宗朝不絕時有僧索諾木嘉木磋者能知已往未來事
稱活佛順義王諳達亦崇信之萬歷七年以迎活佛為
名西侵衛拉特為所敗此僧戒以好殺勸之東還諳達
亦勸此僧通中國乃自甘州遺書張居正自稱釋迦摩
尼比丘求通貢饋以儀物居正不敢受聞之於帝帝命
受之而許其貢由是中國亦知有活佛此僧有異術能
服人諸番莫不從其教即大寶法王及闡化諸王亦皆

俯首稱弟子自是西方止知奉此僧諸番王徒擁虛位
不復能施其號令矣

大乘法王者烏斯藏僧科爾結斯巴也其徒亦稱為尚
師永樂時成祖既封哈里瑪又聞科爾結斯巴有道術
命中官齎璽書銀幣徵之其僧先遣人貢舍利佛像遂
偕使者入朝十一年二月至京帝即延見賜藏經銀鈔
綵幣鞍馬茶果諸物封為萬行圓融妙法最勝真如慧
智弘慈廣濟護國演教正覺大乘法王西天上善金剛

晉應大光明佛領天下釋教賜印誥袈裟幡幢鞍馬繖
器諸物禮之亞於大寶法王明年辭歸賜加於前命中
官護行後數入貢帝亦先後命中官喬來喜楊三保齋
賜佛像法器袈裟禪衣絨錦綵幣諸物洪熙宣德間並
來貢成化四年其王旺布遣使來貢禮官言無法王印
文且從洮州入非制宜減其賜物使者言所居去烏斯
藏二十餘程涉五年方達京師且所進馬多乞給全賜
乃命量增十七年來貢弘治元年其王桑結幹遣使來

貢故事法王卒其徒自相繼承不由朝命三年輔教王
遣使奉貢奏舉大乘法王襲職帝但納其貢賜賚遣還
不命襲職正德五年遣其徒綽爾吉鄂則爾等從河州
衛入貢禮官以其非貢道請減其賞並治指揮徐經罪
從之已綽爾吉鄂則爾有寵於帝亦封大德法王十年
僧旺布索諾木嘉木爍巴勒藏布遣使來貢乞襲大乘
法王禮官失于稽考竟許之嘉靖十五年偕輔教闡教
諸王來貢使者至四千餘人帝以人數踰額減其賞并

治四川三司官濫送之罪初成祖封闡化等五王各有分地惟二法王以遊僧不常厥居故其貢期不在三年之列然終明世奉貢不絕云

大慈法王名沙克嘉伊實烏斯藏僧稱為尚師者也永樂中既封二法王其徒爭欲見天子邀恩寵于是來者趾相接沙克嘉伊實以十二年入朝禮亞大乘法王明年命為妙覺圓通慈慧普應輔國顯教灌頂弘善西天佛子大國師賜之印語十四年辭歸賜佛經佛像法仗

僧衣綺帛金銀器且御製贊詞賜之其徒益以為榮明年遣使來貢十七年命中官楊三保齎佛像衣幣往賜二十一年復來貢宣德九年入朝帝留之京師命成國公朱勇禮部尚書胡濙持節冊封為萬行妙明真如上勝清淨般若弘照普慧輔國顯教至善大慈法王西天正覺如來自在大圓通佛宣宗崩英宗嗣位禮官先奏汰番僧六百九十人正統元年復以為請命大慈法王及西天佛子如故餘遣還不願者減酒饌廩餼自是輦

下稍清西天佛子者能仁寺僧智光也本山東慶雲人
洪武永樂中數奉使西國成祖賜號國師仁宗加號圓
融妙慧淨覺弘濟輔國光範演教灌頂廣善大國師賜
金印冠服金銀器至是復加西天佛子初太祖招徠番
僧本藉以化愚俗弭邊患授國師大國師者不過四五
人至成祖兼崇其教自闡化等五王及二法王外授西
天佛子者二灌頂大國師者九灌頂國師者十有八其
他禪師僧官不可悉數其徒交錯於道外擾郵傳內耗

大官公私騷然帝不恤也然至者猶即遣還及宣宗時則久留京師耗費益甚英宗初年雖多遣斥其後加封號者亦不少景泰中封番僧沙克嘉為弘慈大善法王班珠爾藏布為灌頂大國師英宗復辟務反景帝之政降法王為大國師大國師為國師成化初憲宗復好番僧至者日衆札克巴嘉木燦札實巴勒琳沁札勒等以秘密教得幸並封法王其次為西天佛子他授大國師國師禪師者不可勝紀四方奸民投為弟子輒得食大官

每歲耗費鉅萬廷臣屢以為言悉拒不聽孝宗踐阼清
汰番僧法王佛子以下皆遞降驅還本土奪其印誥由
是輦下復清弘治六年帝惑近習言命取琳沁札勒等
詣京言官交章力諫事乃寢十三年命為故西天佛子
珠卜且琳沁建塔工部尚書徐貫等言此僧無益於國
營墓足矣不當建塔不從尋命納克布嘉木燦三人為灌
頂大國師帝崩禮官請黜異教三人並降禪師既而武
宗盡感倭倖復取琳沁札納至京命為灌頂大國師以

先所降禪師三人為國師帝好習番語引入豹房由是番僧復盛封納克布嘉木燦及札克巴藏布為法王納克布琳沁及綽爾濟羅哲依為西天佛子已封琳沁巴勒丹為大慶法王給番僧度牒三千聽其自度或言大慶法王即帝自號也綽爾吉鄂則爾者烏斯藏使臣留豹房有寵封大德法王乞令其徒二人為正副使還居本土如大乘法王例入貢且為二人請國師誥命入番設茶禮官劉春等執不可帝不聽春等復言烏斯藏遠

在西方性極頑獷雖設四王撫化而其來貢必為節制
若令齋茶以往賜之誥命彼或假上旨以誘諸番妄有
所干請從之則非法不從則生釁害不可勝言帝乃罷
設茶敕而予之誥命帝時益好異教常服其服誦習其
經演法內殿綽爾吉鄂則爾輩出入豹房與權倖雜處
氣餒灼然及二人乘傳歸所過驛驛公私咸被其患世
宗立復汰番僧法王以下悉被斥後世宗崇道教益黜
浮屠自是番僧鮮至中國者

闡化王者烏斯藏僧也初洪武五年河州衛言烏斯藏
帕克穆珠巴之地有僧曰札木揚沙克嘉藏布元時封
灌頂國師為番人推服今朶甘酋薩木珠卜戡藏與袞
鄂爾構兵若遣此僧撫諭朶甘必內附帝如其言仍封
灌頂國師遣使賜玉印綵幣明年其僧使酋長索諾木
藏布貢佛像佛書舍利是時方命佛寶國師招諭番人
於是帕克穆珠巴僧等自稱年巴持遣使進表及方物
帝厚賜之年巴持者其地首僧之稱也八年正月設帕

克穆珠巴萬戶府以番酋為之已而札木揚沙克嘉卒授其徒索諾木扎克巴伊嘉木藏布為灌頂國師二十一年上表稱病舉弟吉喇實巴勒戡藏巴勒藏布自代遂授灌頂國師自是三年一貢成祖嗣位遣僧智光往賜永樂元年遣使入貢四年封為灌頂國師闡化王賜螭紐玉印白金五百兩綺衣三襲錦帛五十匹巴茶二百斤明年命與護教贊善二王必里恭幹國師及必哩朶甘隆達諸衛川藏諸族復置驛站通道往來十一年中

官楊三保使烏斯藏還其王遣從子札戩等隨之入貢
明年復命三保使其地令與闐教獲教贊善三王及春
丕勒吹藏等共修驛站諸未復者盡復之自是道路畢
通使臣往還數萬里無虞寇盜矣其後貢益頻數帝嘉
其誠復命三保齎佛像法器袈裟禪衣及絨錦綵幣往
勞之已又命中官戴興往賜綵幣宣德二年命中官侯
顯往賜絨錦綵幣其貢使嘗歐殺驛官子帝以其無知
遣還敕王戒飭而已九年貢使歸以賜物易茶至臨洮

有司沒人之羈其使請命詔釋之還其茶正統五年王卒遣禪師二人為正副使封其從子結喇實巴勒永鼐戡藏巴勒藏布為闡化王使臣私市茶綵數萬令有司運致禮官請禁之帝念其遠人但令自備舟車已王卒以桑爾結嘉木燦巴勒藏布嗣成化元年禮部言宣正間諸貢不過三四十人景泰時十倍天順間百倍今貢使方至乞敕諭闡化王令如洪武舊制三年一貢從之五年王卒命其子衮噶埒克斯巴忠鼐琳沁嘉木燦巴勒

藏布嗣遣僧進貢還至西寧留寺中不去又冒名入貢
隱匿所賜璽書幣物王使其下三人來趣其僧閉之室
中剗二人目一人逸訴於都指揮孫鑑鑑捕寘之獄受
其徒賄而復以聞下四川巡按鞠治坐僧四人死鑑將
逮治會赦悉免十七年以長河西諸番多假番王名朝
貢命給闡化贊善闡教輔教四王敕書勘合以防奸偽
二十二年遣使四百六十人來貢守臣遵新例但納一
百五十人禮官以使者已入境難固拒請順其情概納

之為後日兩貢之數從之弘治八年遣僧來貢還至揚
州廣陵驛遇大乘法王貢使相與殺牲縱酒三日不去
見他使舟至則以石投之不容近陸知府唐愷詣驛呼
其舟子戒之諸僧持兵仗呼譟擁而人愷走避隸卒力
格鬪乃免為所傷者甚衆事聞命治通事及伴送者罪
遣人諭王令自治其使者其時王卒子巴勒濟姜棟扎
克巴請襲命番僧二人為正副使往封比至新王亦死
其子阿旺扎實扎克巴嘉木爍即欲受封二人不得已

授之遂具謝恩儀物並獻其父所領勘合印章為左驗
至四川守臣刻其擅封逮治論斬減死戍邊副使以下
悉宥正德三年禮官以貢使踰額令為後年應貢之數
嘉靖三年偕輔教王及大小三十六番請入貢禮官以
諸番不具地名族氏令守臣覈實以聞四十三年闡化
諸王遣使入貢請封禮官循故事遣番僧二十二人為
正副使序班朱廷對監之至中途大騷擾不受廷對約
束廷對還白其狀禮官請自後封番王即以誥敕付使

者齋還或下守臣擇近邊僧人齋賜封諸藏之不遣京
寺番僧自此始也番人素以入貢為利雖屢申約束而
來者日增隆慶三年再定令闡化闡教輔教三王俱三
歲一貢貢使各千人半全賞半減賞全賞者遣八人赴
京餘留邊上遂為定例萬曆七年貢使言闡化王長子扎
實藏布乞嗣職如其請久之卒其子請襲神宗許之而
制書但稱闡化王用閣臣沈一貫言加稱烏斯藏帕克
穆珠巴灌頂國師闡化王其後奉貢不替所貢物有畫佛

銅佛銅塔珊瑚犀角氍毹左髻毛纓卓勒瑪特爾點力
劍明甲冑之屬諸王所貢亦如之

贊善王者靈藏僧也其地在四州徽外視烏斯藏為近
成祖踐阼命僧智光往使永樂四年其僧珠卜斯巴勒
戩藏遣使入貢命為灌頂國師明年封贊善王國師如
故賜金印詔命十七年中官楊三保往使洪熙元年王卒
從子納木喀戩藏襲宣德二年中官侯顯往使正統五
年奏稱年老請以長子巴勒丹嘉木磋代帝不從其請

而授其子為都指揮使初入貢無定期自永樂迄正統或間歲一來或一歲再至而歷朝遣使往賜者金幣寶鈔佛像法器袈裟禪服不一而足至成化元年始定三歲一貢之例三年命塔爾巴嘉木燦襲封故事封番王誥敕及幣帛遣官齎賜至是西陲多事禮官乞付使者齎回從之五年四州都司言斡善諸王不遵定制遣使率各寺番僧百三十二種入貢且無番王印文今止留十餘人守貢物餘已遣還禮官言番地廣遠番王亦多

若遵例並時入貢則內郡疲供億莫若令諸王於應貢之歲各具印文取次而來今貢使已至難拂其情乞許作明年應貢之數報可十八年禮官言番王三歲一貢貢使百五十人定制也近贊善王連貢者再已遣四百十三人今請封襲又遣千五百五十人違制宜却乞許其請封襲者以三百人為後來兩貢之數餘悉還亦報可遂封納木喀嘉木燦巴勒藏布為贊善王弘治十六年卒命其弟端珠卜嘉木燦嗣嘉靖後猶入貢如制

護教王者名宗喀巴即納木喀巴勒藏布衮覺僧也咸
祖初僧智光使其地永樂四年遣使入貢詔授灌頂國
師賜之詔明年遣使入謝封為護教王賜金印誥命國
師如故遂頻歲入貢十二年卒命其從子鄂色爾結喇
實巴勒藏布嗣洪熙宣德中並入貢已而卒無嗣其爵
遂絕

闡教王者必哩恭幹僧也成祖初僧智光齋教入番其國
師端珠卜戡藏遣使入貢永樂元年至京帝喜宴賚

遣還四年又貢帝優賜並賜其國師大班第達律師索諾木藏布衣幣十一年乃加號灌頂慈慧淨戒大國師又封其僧琳沁巴勒濟戩藏為闡教王賜印誥綵幣後比年一貢楊三保戴興侯顯之使皆齎金幣佛像法器賜焉宣德五年王卒命其子綽爾濟戩巴琳沁嗣久之卒命其子琳沁巴勒濟嘉木燦嗣成化四年從禮官言申三歲一貢之制明年王卒命其子琳沁嘉木燦巴勒藏布襲二十年帝遣番僧班珠爾齋墾書勘合往賜其

僧憚行至半道偽為王印信番文復命詔逮治正德十三年遣番僧琳沁扎克巴等封其新王扎克巴等乞馬快船三十艘載食鹽為入番買路之資戶科戶部並疏爭不聽扎克巴等在途糾索無厭至呂梁歐管洪主事李瑜幾斃恣橫如此迄嘉靖世闡教王修貢不輟

輔教王者斯達克藏僧也其地視烏斯藏尤遠成祖即位命僧智光持詔招諭賜以銀幣永樂十一年封其僧納木喀埒克斯巴為輔教王賜誥印綵幣數通貢使楊

三保侯顯皆往賜其國與諸法王等景泰七年使來貢
自陳年老乞令其子納木喀嘉木燦巴勒藏布代帝從
之封為輔教王賜誥敕金印綵幣袞裳法器以灌頂國
師噶勒藏右覺義薩嘉巴充正副使往封至四川多雇
牛馬任載私物禮官請治其罪英宗方復辟命收其敕
書減供應之半成化五年王卒命其子納木喀扎實嘉
木燦巴勒藏布嗣六年申舊制三年一貢多不過百五
十人由四川雅州入國師以下不許貢弘治十二年輔

教等四王及長河西宣慰司並時入貢使者至二千八百餘人禮官以供費不貲請敕四川守臣遵制遣送違者却還從之歷正德嘉靖世奉貢不絕

西天阿難功德國西方番國也洪武七年王布噶爾遣其講主必鼎西來朝貢方物及解毒藥石詔賜文綺禪衣及布帛諸物後不復至又有和林國師多爾濟吹埒克斯巴勒藏布亦遣其講主潤努旺舒克來朝獻銅佛舍利白哈達布及元所授玉印一玉圖書一銀印四銅

印五金字牌三命宴賚遣還明年國師入朝又獻佛像
舍利馬二匹賜文綺禪衣和林即元太祖故都在極北
非西番其國師則番僧與功德國同時來貢後亦不復
至

尼巴勒國在諸藏之西去中國絕遠其王皆僧為之洪
武十七年太祖命僧智光齋墨書綵幣往并使其鄰境
地湧塔國智光精釋典負才辨宣揚天子德意其王瑪
達納拉摩遣使隨入朝貢金塔佛經及名馬方物二十

年達京師帝喜賜銀印玉圖書誥敕符驗及幡幢綵幣
二十三年再貢加賜玉圖書紅羅織終太祖時數歲一
貢成祖復命智光使其國永樂七年遣使來貢十一年
命楊三保齎璽書銀幣賜其嗣王僧格實迪及地湧塔
王凱巴明年遣使來貢封僧格實迪為尼巴勒國王賜
誥及鍍金銀印十六年遣使來貢命中官鄧誠齎璽書
錦綺紗羅往報之所經罕東靈藏必哩教幹烏斯藏及
伊郎布魯皆有賜宣德二年又遣中官侯顯賜其王絨

錦紵絲地湧塔王如之自後貢使不復至又有蘇木都松者亦西方之國永樂三年遣行人拉達等齎敕往招賜銀鈔綵幣其酋以道遠不至

朶甘在四川徼外南與烏斯藏鄰唐吐蕃地元置宣慰司招討司元師府萬戶府分統其衆洪武二年太祖定陝西即遣官齎詔招撫又遣員外郎許允德諭其酋長舉元故官赴京攝帝師蘭戩巴藏布及故國公納木喀斯丹巴伊戩藏等于六年春入朝上所舉六十人名帝

喜置指揮使司二曰朶甘曰烏斯藏宣慰司二元帥府
一招討司四萬戶府十三千戶所四即以所舉官任之廷
臣言來朝者授職不來者宜弗予帝曰吾以誠心待人
彼不誠曲在彼矣萬里來朝俟其再請豈不負遠人歸
嚮之心遂皆授之降詔曰我國家受天明命統御萬方
恩撫善良武威不服凡在幅員之內咸推一視之仁乃
者攝帝師蘭戩巴藏布率所舉故國司徒宣慰招討
元帥萬戶諸人自遠入朝朕嘉其識天命不勞師旅共

放職方之貢已授國師及故國公等為指揮同知等官
皆給誥印自今為官者務遵朝廷法撫安一方僧務敦
化遵之誠率民為善共享太平永綏福祉豈不休哉並
宴賚遣還初元尊番僧為帝師授其徒國公等秩故降
者襲舊號索諾木鄂則爾者歸朝授朶甘衛指揮僉事
以元司徒銀印來上命進指揮同知已而朶甘宣慰薩
木珠卜噶藏舉首領可為指揮宣慰萬戶千戶者二十二
人詔從其請鑄分司印予之乃改朶甘烏斯藏二衛為行

都指揮使司以索諾木鄂則爾為朶甘都指揮同知袁
楚克鄂則爾為烏斯藏都指揮同知並賜銀印又設西
安行都指揮使司於河州兼轄二都司已佛寶國師索
諾木鄂則爾等遣使來朝奏舉故官薩木珠卜戢藏等
五十六人命增置朶甘思宣慰司及招討等司招討司
六曰朶甘思曰朶甘隆達曰朶甘丹曰朶甘倉唐曰朶
甘川曰穆賚堪萬戶府四曰沙爾康曰鼐珠曰羅斯敦
曰埒克斯瑪千戶所十七以薩木珠卜戢藏為朶甘都

指揮同知餘授職有差自是諸番修貢惟謹八年置鄧
噉實軍民元帥府尋置隆達衛指揮使司十八年以班
珠爾藏布為烏斯藏都指揮使乃更定品秩自都指揮
以下皆令世襲未幾又改烏斯藏安布嚕克衛為行都
指揮使司二十六年西番斯薨日等族遣使貢馬命賜
金銅信符文綺襲衣許之朝貢永樂元年改必哩千戶
所為衛後置烏斯藏諾爾松塞行都指揮使司又置上
印部衛皆以番人官之十八年帝以西番悉入職方其

最遠丕勒等百餘寨猶未歸附遣使往招亦多貢帝以番俗惟僧言是聽乃寵以國師諸美號賜誥印令歲朝由是諸番僧來者日多迄宣德朝禮之益厚九年命中官宋成等齎璽書賜物使其地敕都督趙安率兵送之必哩卓勒江正統初以供費不貲稍為裁損時有番長移書松潘守將趙得言欲入朝為生番阻遏乞遣兵開道詔令得遣使招生番相率朝貢者八百二十九寨悉賜賚遣歸天順四年四川三司言比奉敕書番僧朝貢入

京者不得過十人餘留境上侯賞今蜀地災傷若悉留
之動經數月有司困於供億宜如正統間制宴待遣還
報可成化三年阿錫洞諸族土官言西番大小二姓為
惡殺之不懼惟國師喇嘛勸化則革心信服乃進禪師
雲丹藏布為國師都綱子瑞為禪師以化導之六年申諸
番三歲一貢之例國師以下不許貢於是貢使漸希初太祖以西
番地廣人獷悍欲分其勢而殺其力使不為邊患故來
者輒授官又以其地皆食肉倚中國茶為命故設茶課

司於天全六番令以馬市而入貢者又優以茶布諸番
戀貢市之利且欲保世官不敢為變迨成祖益封法王
及大國師西天佛子等俾轉相化導以共尊中國以故
西陲宴然終明世無番寇之患

長河西魚通寧遠宣慰司在四川徼外地通烏斯藏唐
為吐蕃元時置碉門魚通黎雅長河西寧遠六安撫司
隸吐蕃宣慰司洪武時其地打箭鑪長河西土官元右
丞拉旺莽遣其理問高惟善來朝貢方物宴賚遣還十

六年復遣惟善及從子萬戶如克拉貢命置長河西等處軍民安撫司以拉旺莽為安撫使賜文綺四十八匹鈔二百錠授惟善禮部主事二十年遣惟善招撫長河西魚通寧遠諸處明年還朝言安邊之道在治屯守而兼恩威屯守既堅雖遠而有功恩威未備雖近而無益今魚通九枝疆土及巖州雜道二長官司東鄰碉門黎雅西接長河西自唐時吐蕃疆盛寧遠安靖巖州漢民往往為彼驅入九枝魚通防守漢邊元初設二萬戶府

仍與盤陀仁陽置立寨柵邊民戍守其後各枝率衆攻仁陽等柵及川蜀兵起乘勢侵陵雅邛嘉等州洪武十年始隨硯門土酋歸附巖州雜道二長官司自國朝設迄今十有餘年官民仍舊不相統攝蓋無統制之司恣其猖獗因襲舊弊故也其近而已附者如此遠而未附者何由而臣服之且巖州寧遠等處乃古之州治苟撥兵戍守就築城堡開墾山由使近者向化而先附遠者畏威而來歸西域無事則供我徭役有事則使之先驅

撫之既久則皆為我用如臣之說其便有六通烏斯藏
朵甘鎮撫長河西可拓地四百餘里得番人二千餘戶
非惟黎雅保障蜀亦永無西顧憂一也番民所處魯斯
岡之地土瘠人繁專務貿販碣門烏茶蜀之細布博易
羌貨以贍其生若於巖川立市則此輩衣食皆仰給於
我焉敢為非二也以長河西布斯敦巴莽等八千戶為
外番犄角其勢必固然後招徠遠者如其不來使八十
戶近為內應遠為鄉導此所謂以蠻攻蠻誠制邊之善

道三也天全六番招討司八鄉之民宜悉蠲其徭役專
令蒸造烏茶運至巖州置倉收貯以易番馬比之雅州
易馬其利倍之且於打箭鑪原易馬處相去甚近而價
增于彼則番民如蟻之慕羶歸市必衆四也巖州既立
倉易馬則番民運茶出境倍收其稅其餘物貨至者必
多又魚通九枝蠻民所種水陸之田歲年無征若令歲
輸租米并令軍士開墾大渡河兩岸荒田亦可供給戍
守官軍五也碉門至巖州道路宜令繕修開拓以便往

來人馬仍量地里遠近均立郵傳與黎雅烽火相應庶
可以防遏亂畧邊境無虞六也帝從之後建昌酋伊嚕
特穆爾叛長河西諸酋陰附之失朝貢太祖怒三十年
春謂禮部臣曰今天下一統四方萬國皆以時奉貢如
烏斯藏尼巴勒國其地極遠猶三歲一朝惟打箭鑪長
河西土酋外附伊嚕特穆爾嘉噶爾不臣中國興師討
之鋒刃之下死者必衆宜遣人諭其酋若聽命來覲一
以恩待不悛則發兵三十萬聲罪徂征禮官以帝意為

河西魚通寧遠宣慰司以其首為宣慰使自是修貢不
絕初魚通及寧遠長河西本各為部至是始合為一永
樂十三年貢使言西番無他土產惟以馬易茶近年禁
約生理實難乞仍許開中從之二十一年宣慰使囊哩
等二十四人來朝貢馬正統二年囊哩卒子札巴僧嗣
成化四年申諸番三歲一貢之命惟長河西仍比歲一
貢六年頒定二年或三年一貢之例貢使不得過百人

十七年禮官言烏斯藏在長河西之西長河西在松潘越巂之南壤地相接易於混淆烏斯藏諸番王例三歲一貢彼以道險來少而長河西番僧往往詐為諸王文牒入貢冒賞請給諸番王及長河西董卜韓胡敕書勘合邊臣審驗方許進入庶免詐偽之弊或道阻不許補貢從之十九年其部內灌頂國師遣僧徒來貢至千八百人守臣劾其違制詔止納五百人餘悉遣還二十二年禮官言長河西以黎州大渡河寇發連歲失貢至是

補進三貢定制道梗者不得再補但今貢物已至宜順其情納之而量減賜賚報可弘治十二年禮官言長河西及烏斯藏諸番一時並貢使者至二千八百餘人乞諭守臣無濫送亦報可然其後來者愈多卒不能却嘉靖三年定令不得過一千人隆慶三年定五百人全賞遣八人赴京之制如闡教諸王其貢物則珊瑚氍毹之屬悉準闡化王傳所載諸番貢皆如之

董卜韓胡宣慰司在四川威州之西其南與天全六番接永樂九年酋長納木噶遣使奉表入朝貢方物因言

達隆莽碉門二招討侵掠鄰境阻遏道路請討之帝不
欲用兵降敕慰諭使比年一貢賜金印冠帶正統三年
奏年老乞以子克嚕卜嘉木燦代從之兇狡不循禮法
七年乞王封賜金印帝不許命進秩鎮國將軍都指揮
同知掌宣慰司事給之誥命益恃強數與雜谷安撫及
伯薩爾寨安撫饒噶爾構怨十年八月移牒四川守臣
謂伯薩爾寨本父納木噶故地分畀饒噶爾父者後饒噶
爾受事私奏於朝獲設安撫司通乃偽為宣慰司印自

稱宣慰使糾合雜谷諸番將侵噬已地已拘執饒噶爾
追出偽印用番俗法剋去兩目謹以狀聞守臣上其事
帝遣使齎敕責其專擅令與使臣推擇饒噶爾族人為
安撫仍轄其土地且送還饒噶爾養之終身十三年十
月四川巡按張洪等奏近接董卜宣文牒言雜谷故
安撫烏標小妻毒殺其夫及子又賄威州千戶唐泰誣
已謀叛今備物進貢欲從銅門山西開山通道乞官軍
於日駐迓之臣等竊以雜谷內聯威州保縣外鄰董卜

韓胡雜谷力弱欲抗董卜實倚重於威保董卜勢強欲通威保却受阻於雜谷以此讐殺素不相能銅門及日駐諸寨乃雜谷威保要害地董卜欺雜谷妻寡子弱瞰我軍遠征麓川假進貢之名欲別開道路意在吞滅雜谷構陷唐泰所請不可許乃下都御史寇深等計度其議迄不行時董卜比歲入貢所遣僧徒強悍不法多攜私物強索舟車騷擾道途詈辱長吏天子聞而惡之景泰元年賜敕切責尋侵奪雜谷及塔斯蠻長官司地掠其人畜守臣不能制

三年二月朝議獎其入貢勤誠進秩都指揮使令還二
司侵地及所掠人民其首即奉命惟舊維州之地尚為
所據俄饋四川巡撫李匡銀罌金珀求御製大誥周易
尚書毛詩小學方輿勝覽成都記諸書匡聞之於朝因
言唐時吐番求毛詩春秋于休烈謂予之以書使知權
謀愈生變詐非中國之利裴光廷謂吐番久叛新服因
其有請賜以詩書俾漸陶聲教化流無外休烈徒知書
有權畧變詐不知忠信禮義皆從書出明皇從之今茲

所求臣以為予之便不然彼因貢使市之書肆甚不為
難惟方輿勝覽成都記形勝關塞所具不可概予帝如
其言尋以其還侵地賜敕獎勵六年兵部尚書于謙等
奏其僭稱蠻王窺伺巴蜀所上奏章語多不遜且招集
羣番大治戎器悖逆日彰不可不慮宜敕守臣預為戒
備從之克嚕卜嘉木燦死子扎實嘉木燦藏布遣使來
貢命為都指揮同知掌宣慰司事天順元年遣使入貢
乞封王命如其父官進秩都指揮使仍掌宣慰司事成

化五年四川三司奏保縣僻處極邊永樂五年特設雜
谷安撫司今撫輯舊維州諸處蠻寨後與董卜構兵維
州諸地俱為侵奪貢道阻絕今雜谷恢復故疆將遣使來
貢不知貢期未敢擅遣帝從禮官言許以三年為期四
年申諸番三年一貢之例惟董卜許比年一貢六年扎實嘉
木燦藏布卒子綽鄂結楊沁嗣為都指揮使弘治三年
卒子日默特扎實巴旺丹巴藏布遣國師貢珊瑚樹毯
氍毹甲冑諸物請嗣父職許之賜詔命敕書綵幣九年卒

子囊愛請襲亦遣國師貢方物詔授以父官卒子永忠
端珠布襲嘉靖二年再定令貢使不得過千人其所隸
伯薩爾寨及嘉勒噶斡寺別貢隆慶二年董卜及伯薩
爾寨貢使多至千七百餘人命子半賞遣八人赴京為
定制迄萬厯後朝貢不替

明史三百三十一

欽定四庫全書

明史卷三百三十一考證

按卷內繙繹各名過多難以增刪勾刻擬將全卷另刊
謹識

烏斯藏大寶法王傳烏斯藏在雲南西徼外
臣方燁

按識大錄及廣輿記皇輿考烏斯藏其屬百餘種散
處河湟江岷間唐初為吐番所并謹識

烏斯藏大寶法王傳元世祖尊帕克斯巴為大寶法王

賜玉印

臣

方煒按續通鑑綱目賜玉印時並令總

天下釋教謹識

烏斯大寶法王傳冬元帝師之後索諾木戩巴藏布元

國公格埒克斯戩藏巴勒藏布並遣使乞玉印

臣

方煒按識大錄洪武六年並以元國公等為都指揮

同知宣慰司招討使等官謹識

烏斯藏大寶法王傳永樂元年命司禮少監侯顯僧智

光齋書幣往徵

臣

方煒按永樂三年往徵四年將

至而識大錄又云往返五年乃至與傳互異謹識

烏斯藏大寶法王傳帝延見於奉天殿

臣方煒按明

成祖躬自行香時聞梵唄空樂自天而下學士胡廣等獻聖孝瑞應歌詳識大錄謹識

烏斯藏大寶法王傳命建普度大齋於靈谷寺

臣方

煒按建普度大齋於靈谷寺時並建大法壇詳識大

錄謹識

烏斯藏大寶法王傳帝惑近習言

臣方煒按帝惑近

習言考識大錄係烏斯藏使綽爾吉鄂則爾之言也

謹識

大慈法王傳其徒爭欲見天子邀恩寵

臣方煒按識

大錄云其徒有曰司空曰司徒曰國公皆佩金印謹

識

大慈法王傳既而武宗盡惑佞倖

臣方煒按識大錄

明武宗信佛給番僧度牒至三萬之多謹識

闡化王傳成祖嗣位遣僧智光往賜

臣方煒按識大

錄明成祖嘗欲建壇雞鳴山之陽超度妖厲迎取烏
斯藏有道僧登壇作法有天雨寶花之異傳未之載
謹識

護教王傳正德十三年遣番僧琳沁札克巴等

臣方

煒按識大錄正德時明武宗習僧門自號大慶法王
被服如番僧建僧寺於西華門內悉封諸國師予誥
合於是法王佛子禪國師之號充滿京師謹識

尼巴勒國傳在諸藏之西去國中絕遠其王皆番僧為之

臣方煒按識大錄明時自岷以南至松潘威茂各建僧寺番族叛亂仇殺遣沙門諭之即頂經說誓而散諸番來貢多至千餘亦惟僧人是遣謹識

朶甘傳乃改朶甘烏斯藏二衛為行都指揮使司

臣

方煒按行都指揮使司係洪武七年所改詳明實錄謹識

朶甘傳命僧置朶甘思宣慰司及招討等司

臣

方煒

按招討司朶思部落也初附本司進貢而襲職成化

後使專達詳識大錄謹識

長河西魚通寧遠宣慰司傳令魚通九枝疆土及巖州

雜道二長官司

臣方煒按識大錄云雜道長官司

河西部落也初附本司進貢每貢僧徒百人成化十六年始專達隆慶三年定三年一貢謹識

董卜韓胡宣慰司傳俄饋四川巡撫李匡銀篋金珀求御製大誥周易尚書毛詩小學方輿勝覽成都記諸書乃聞之於朝

臣

方煒按唐時吐番求毛詩春秋

云云考識大錄係余子俊上疏之語與傳互異考子俊傳又未載是事謹識

董卜韓胡宣慰司傳遣國師貢珊瑚樹璫魯甲冑諸物
臣方煒按識大錄廣輿記其地重兵死以累世戰
歿者為甲門敗懦者垂狐尾於首以示辱謹識

董卜韓胡宣慰司傳隆慶三年董卜及伯薩爾寨貢使
多至千七百餘人臣方煒按識大錄云隆慶三年
定每貢千二百七十四人孝宗時又有新招撫士草

坡克州等寨附屬本司謹識

明史卷三百三十一考證

欽定四庫全書

明史卷三百三十二

大學士張廷玉等奉敕修

列傳第二百二十

西域四

賽瑪爾堪

實喇哈雅

達實干

薩蘭

揚伊克

克實克

德爾默

布哈爾

巴什伯里

哈里

安都呼

拔達克山

和闐

實喇蘇

愛達罕

喀什噶爾

伊蘓布哈

呼爾察

奇爾瑪勒

博斯和勒

達爾瑪

納實哲干

密珍

日羅

密實爾

赫嚕

托喇思

阿蘓

薩和爾

天方

默德訥

坤城

哈桑等二十九部附

嚕默特

賽瑪爾堪即漢屬賓地隋曰漕國唐復名屬賓皆通中國元太祖蕩平西域盡以諸王駙馬為之君長易前代

國名以蒙古語始有賽瑪爾堪之名去嘉峪關九千六
百里元末為之王者駙馬特穆爾也洪武中太祖欲通
西域屢遣使招諭而遐方君長未有至者二十年四月
特穆爾首遣回回滿拉克巴斯等來朝貢馬十五駝二
詔宴其使賜白金十有八錠自是頻歲貢馬駝二十五
年兼貢絨六匹青梭幅九匹紅綠薩噶哩各二匹及鑕
鐵刀劍甲冑諸物而其國中回回又自驅馬抵涼州互
市帝不許令赴京鬻之元時回回徧天下及是居甘肅

者尚多詔守臣悉遣之於是歸賽瑪爾堪者千二百餘人二十七年八月特穆爾貢馬二百其表曰恭惟大明大皇帝受天明命統一四海仁德洪布恩養庶類萬國欣仰咸知上天欲平治天下特命皇帝出膺運數為億兆之主光明廣大昭若天鏡無有遠近咸照臨之臣特穆爾僻在萬里之外恭聞聖德寬大超越萬古自古所無之福皇帝皆有之所未服之國皇帝皆服之遠方絕域昏昧之地皆清明之老者無不安樂少者無不長遂

善者無不蒙福惡者無不知懼今又特蒙施恩遠國凡
商賈之來中國者使觀覽都邑城池富貴雄壯如出昏
暗之中忽睹天日何幸如之又承勅書恩撫勞問使站
驛相通道路無壅遠國之人咸得其濟欽仰聖心如照
世之杯使臣心中豁然光明臣國中部落聞茲德音歡
舞感戴臣無以報恩惟仰天祝頌聖壽福祿如天地永
永無極照世杯者其國舊傳有杯光明洞徹照之可知
世事故云帝得表嘉其有文明年命給事中傅安等齎

璽書幣帛報之其貢馬一歲再至以千計並賜寶鈔償之成祖踐阼遣使敕諭其國永樂三年傅安等尚未還而朝廷聞特穆爾假道巴什伯里率兵東救甘肅總兵官宋晟倣備五年六月安等還初安至其國被留朝貢亦絕尋令人導安徧歷諸國數萬里以誇其國廣大至是特穆爾死其孫哈里嗣乃遣使臣呼岱達等送安還貢方物帝厚賚其使遣指揮拜顏爾欽台等往祭故王而賜新王及部落銀幣其頭目實喇卜諾爾丹等亦貢

駝馬命安等賜其王綠幣與貢使偕行七年安等還王遣使隨入貢自後或比年或間一歲或三歲輒入貢十三年遣使隨李達陳誠等入貢暨辭歸命誠及中官魯安偕往賜其頭目鄂勒博等白銀綠幣其國復遣使隨誠等入貢十八年復命誠及中官郭敬齋敕及綠幣報之宣德五年秋冬頭目鄂勒博密爾咱等遣使再入貢七年遣中官李貴等齎文綺羅錦賜其國正統四年貢良馬色元蹄額皆白帝愛之命圖其像賜名瑞撫賞賚

有加十年十月書諭其王鄂勒博齊魯根曰王遠處西
陲恪修職貢良足嘉尚使回特賜王及王妻子緣幣表
裏示朕優待之意別敕賜金玉器首龍杖細馬鞍及諸
色織金文綺官其使臣為指揮食事景泰七年貢馬駝
玉石禮官言舊制給賞太重今正副使應給一等二等
賞物者如舊時三等入給緣緞四表裏絹三匹織金紵
絲衣一襲其隨行鎮撫舍人以下遞減有差所進阿勒
呼木馬每匹緣緞四表裏絹八匹駝三表裏絹十匹達

勒達馬不分等第每匹紵絲一匹絹八匹折鈔絹一匹
中等馬如之下等者亦遞減有差制可言又所貢玉石
堪用者止二十四塊六十八觔餘五千九百餘觔不適
於用宜令自鬻而彼堅欲進獻請每五觔賜絹一匹亦
可之已而使臣還賜王保賽音文綺器物天順元年命
都指揮馬雲等使西域敕獎其素勒坦茂薩賜線幣令
護朝使往還素勒坦者君長之稱猶蒙古汗也七年復
命指揮詹昇等使其國成化中其素勒坦阿里瑪三入

貢十九年偕伊實干酋長貢二獅至肅州其使者奏請大臣往迎職方郎中陸容言此無用之物在郊廟不可為犧牲在乘輿不可被駟服宜勿受禮官周洪謨等亦言往迎非禮帝卒遣中使迎之獅日嗽生羊二醋酐蜜酪各二瓶養獅者光祿日給酒饌帝既厚加賜賚而其使者怕噲勒溫以為輕援永樂間例為請禮官議從正統四年例加綵幣五表裏使者復以為輕乃加正副使各二表裏從者半之命中官韋洛鴻臚署丞海濱送之

還其使者不由故道赴廣東又多買良家女為妻妾洛
等不為禁止久之洛上疏妻罪於濱濱坐下吏其使者
請泛海至滿刺加市狻猊以獻市舶中官韋眷主之布
政使陳選力陳不可乃已弘治二年其使由滿刺加至
廣東貢獅子鸚鵡諸物守臣以聞禮官耿裕等言南海
非西域貢道請却之禮科給事中韓鼎等亦言狔獐之
獸狎玩非宜且騷擾道路供費不貲不可受帝曰珍禽
奇獸朕不受獻況來非正道其即却還守臣違制宜罪

姑貸之禮官又言海道固不可開然不宜絕之已甚請
薄犒其使量以綺帛賜其王制可明年又偕土魯番貢
獅子及哈喇呼爾噶諸獸由甘肅入鎮守中官傅德總
兵官周玉等先圖形奏聞即遣人馳驛起送獨巡按御
史陳瑤論其糜費煩擾請勿納禮官議如其言量給犒
賞且言聖明在御屢却貢獻德等不能奉行德意請罪
之帝曰貢使既至不必却回可但遣一二人詣京獅子
諸物每獸日給一羊不得妄費德等貸勿治後至十六

年始來貢明年復至而正德中猶數至嘉靖二年貢使
又至禮官言諸國使臣在途者遷延隔歲在京者伺候
同賞光祿郵傳供費不貲宣示以期約因列上禁制數
事從之十一年偕天方土魯番入貢稱王者至百餘人
禮官夏言等論其非請敕閩臣議所答張孚敬等言西
域諸王疑出本國封授或部落自相尊稱先年亦有至
三四十人者即據所稱答之若驟議裁革恐人情觖望
乞更敕禮兵二部詳議於是言及樞臣王憲等謂西域

稱王者止土魯番天方賽瑪爾堪如日羅諸國稱名雖多朝貢絕少弘正間土魯番十三人貢正德間天方四人貢稱王者率一人多不過三人餘但稱頭目而已至嘉靖二年八年天方多至六七人土魯番至十一二人賽瑪爾堪至二十七人亨敬等言三四十人者并數三國爾今土魯番十五王天方二十七王賽瑪爾堪五十三王實前此所未有弘治時回賜敕書止稱一王若循賽瑪爾堪往歲故事類答王號人與一敕非所以尊中國

制外蕃也蓋帝王之馭外蕃固不拒其來亦必限以制其或名號僭差言詞侮慢則必正以大義責其無禮今謂本國所封何以不見故牘謂部落自號何以達之天朝我槩給以敕而彼即據敕恣意往來恐益擾郵傳費供億殫府庫以實谿壑非計之得也帝納其言國止給一敕且加詰讓示以國無二王之義然諸蕃迄不從十五年入貢復如故甘肅巡撫趙載奏諸國稱王者至一百五十餘人皆非本朝封爵宜令改正且定貢使名數

通事宜用漢人毋專用色目人致交通生釁部議從之
二十六年入貢甘肅巡撫楊博請重定朝貢事宜禮官
復列數事行之後入貢迄萬厯中不絕蓋番人善賈貪
中華互市既入境則一切飲食道途之資皆取之有司
雖定五年一貢迄不肯遵天朝亦莫能難也其國東西
三千餘里地寬平土壤膏腴王所居城廣十餘里民居
稠密西南諸番之貨皆聚於此號為富饒城東北有土
屋為拜天之所規制精巧柱皆青石雕為花文中設講

經之堂用泥金書經裏以羊皮俗禁酒人物秀美工巧
過於哈里而風俗土產多與之同其旁近東有實喇哈
雅達實干薩蘭揚伊克西有克實克達實密諸部落皆
役屬焉

實喇哈雅西去賽瑪爾堪五百餘里城居小岡上西北
臨河河名火站水勢衝急架浮梁以渡亦有小舟南近
山人多以崖谷而居園林廣茂西有大沙洲可二百里
無水間有之鹹不可飲牛馬誤飲之輒死地生臭草高

尺餘葉如蓋煮其液成膏即阿魏又有小草高一二尺
叢生秋深露凝食之如蜜煮為糖番名達蘭古爾班永
樂間李達陳誠使其地其首即遣使奉貢宣德七年命
中官李貴齎敕諭其酋賜金織文綺線幣

達實干西去賽瑪爾堪七百餘里城居平原周二里外
多園林饒果木土宜五穀民居稠密李達陳誠李貴之
使與實喇哈雅同

薩蘭在達實干之東西去賽瑪爾堪千餘里有城郭周

二三里四面平曠居人繁庶五穀茂殖亦饒果木夏秋
間草中生黑小蜘蛛人被螫徧體痛不可耐必以薄荷
枝掃痛處又用羊肝擦之誦經一晝夜痛方止體膚盡
蛻六畜被傷者多死凡止宿必擇近水地避之元太祖
時都元帥薛富勒哈從征薩蘭諸國以礮立功即此地
也陳誠李貴之使與諸國同

揚伊克在薩蘭東三百六十里城居亂山間東北有大
溪西流入巨川行百里多荒城蓋其地介巴什伯里蒙

古部落之間數被侵擾以故人民散亡止戌卒數百人
居孤城破廬頽垣蕭然榛莽永樂時陳誠至其地

克實克在賽瑪爾堪西南三百六十里城居大村周十
餘里宮室壯麗堂以玉石為柱牆壁牕牖盡飾金碧綴
琉璃其先賽瑪爾堪酋長駙馬特穆爾居之城外皆水
田東南近山多園林西行十餘里饒奇木又西三百里
大山屹立中有石峽兩崖如斧劈行二三里出峽口有
石門色似鐵路通東西番人號為鐵門關設兵守之或

言元太祖至東印度鐵門關遇一角獸能人言即此物也
德爾默在賽瑪爾堪西南去哈里二千餘里有新舊二
城相去十餘里其酋長居新城城內外居民僅數百家
畜牧蕃息城在阿珠河東多魚河東地隸賽瑪爾堪西
多蘆林產獅子陳誠李達嘗使其地

布哈爾在賽瑪爾堪西北七百餘里城居平川周十餘
里戶萬計市里繁華號為富庶地卑下節序嘗溫宜五
穀桑麻多絲綿布帛六畜亦饒永樂十三年陳誠自西

域還所經哈里賽瑪爾堪巴什伯里安都呼拔達克山
德爾默實喇哈雅薩蘭克實克揚伊克火州柳城土魯
番鹽澤哈密達干布哈爾凡十七國悉詳其山川人物
風俗為使西域記以獻以故中國得考焉宣德七年命
李達撫諭西域布哈爾亦與焉

巴什伯里西域大國也南接和闐北連衛拉特西抵賽
瑪爾堪東抵火州東南距嘉峪關三千七百里或曰焉
耆或曰龜茲元世祖時設宣慰司尋改為元帥府其後

以諸王鎮之洪武中藍玉沙征漠至捕魚兒海獲賽瑪爾堪商人數百太祖遣官送之還道經巴什伯里其王克德爾和卓即遣千戶哈瑪爾丹等來朝貢馬及海青以二十四年七月達京師帝喜賜王綵幣十表裏其使者皆有賜九月命主事寬徹御史韓敬評事唐鉦使西域以書諭克德爾和卓曰朕觀普天之下后土之上有國者莫知其幾雖限山隔海風殊俗異然好惡之情血氣之類未嘗異也皇天眷佑惟一視之故受天命為天

下主者上奉天道一視同仁俾巨細諸國殊方異類之
君民咸躋乎仁壽而友邦遠國順天事大以保國安民
皇天監之亦克昌焉曩者我中國宋君奢縱怠荒奸臣
亂政天監否德於是命元世祖肇基朔漠入統中華生
民賴以安靖七十餘年至於後嗣不修國政任用非人
致紀綱盡弛強陵弱衆暴寡民生嗟怨上達於天天用
是革其命屬之於朕朕躬握乾符以主黔黎凡諸亂雄
擅聲教違朕命者兵偃之順朕命者德撫之是以三十

年間諸夏奠安外蕃賓服惟元臣曼濟哈喇章等尚率殘衆生釁寇邊興師致討勢不容已兵至捕魚兒海故元諸王駙馬率其部屬來降有賽瑪爾堪數百人以貿易來者朕命官護歸已三年矣使者還王即遣使來貢朕甚嘉之王其益堅事大之誠通好往來使命不絕豈不保封國於悠久乎特遣官勞嘉其悉朕意徹等既至王以其無厚賜拘留之敬鉦二人得還三十年正月復遣官齎書諭之曰朕即位以來西方諸商來我中國互市

者邊將未嘗阻絕朕復敕吏民善遇之由是商人獲利
疆場無擾是我中華大有惠於爾國也前遣寬徹等往
爾諸國通好何故至今不返吾於諸國未嘗拘留一人
而爾顧拘留吾使豈理也哉是以近年回回入境者亦
令於中國互市待徹歸放還後諸人言有父母妻子吾
念其至情悉縱遣之今復使使諭爾俾知朝廷恩意毋
梗塞道路致啓兵端書曰怨不在大亦不在小惠不惠
懋不懋爾其惠且懋哉徹乃得還成祖即位之冬遣官

齋璽書綵幣使其國未幾克德爾和卓卒子實默察罕
嗣永樂二年遣使貢玉璞名馬宴賚有加時哈密忠順
王昂克特穆爾為汗郭勒齊毒死實默察罕率師討之
帝嘉其義遣使賚以綵幣令與嗣忠順王托克托敦睦
四年夏來貢命鴻臚寺丞劉特穆爾齋敕幣勞賜與其
使者偕行秋冬暨明年夏三八貢因言賽瑪爾堪本其
先世故地請以兵復之命中官把太李達及劉特穆爾
齋敕戒以審度而行毋輕舉因賜之綵幣六年太等還

言實默察罕已卒弟瑪哈穆特嗣帝即命太等往祭并賜其新王八年以朝使往賽瑪爾堪者瑪哈穆特待之厚遣使齎綵幣賜之明年貢名馬文豹命給事中傅安送其使還齎金織文綺時衛拉特使者言瑪哈穆特將襲其部落因諭以順天保境之義十一年貢使將至甘肅命所司宴勞且敕總兵官李彬善遇之明年冬有自西域還者言瑪哈穆特母及弟相繼卒帝愍之命安齎敕慰問齎以綵幣已而瑪哈穆特亦卒無子從子諾海色

徹肯嗣十四年春使來告喪命安及中官李達弔祭即封其嗣子為王賚文綺弓刀甲冑其母亦有賜明年遣使來貢言將嫁女賽瑪爾堪請以馬市妝奩命中官李信等以綺帛各五百匹助之十六年貢使蘓格言其王為從弟烏蘓所弑而自立徙其部落西去更國號曰伊埒巴爾帝以番俗不足治授蘓格為都督僉事而遣中官楊忠等賜烏蘓弓刀甲冑及文綺綵幣其頭目呼岱達等七十餘人並有賜自是奉貢不絕宣德元年帝嘉其

尊事朝廷遣使賜之鈔幣明年入貢授其正副使為指揮千戶賜誥命冠帶自後使臣多授官三年貢駝馬命指揮昌英等齎書綵幣報之時烏蘓連歲貢而其母索勒坦哈屯亦連三歲來貢烏蘓卒子額森布哈嗣正統元年遣使來朝貢方物後亦頻入貢故王烏蘓之婿保賽音亦遣使來貢十年額森布哈卒額密勒和卓嗣明年貢馬駝方物命以綵幣賜王及王母景泰三年貢玉石三千八百斤禮官言其不堪用詔悉收之每二觔

賜帛一匹天順元年命千戶于志敬等以復辟諭其王
且賜綵幣成化元年禮官姚夔等定西域朝貢期令伊
埒巴爾三歲五歲一貢使者不得過十人自是朝貢遂
稀其國無城郭宮室隨水草畜牧人性獷悍君臣上下
無體統飲食衣服多與衛拉特同地極寒深山窮谷六
月亦飛雪

哈里一名赫魯在賽瑪爾堪西南三千里去嘉峪關萬
二千餘里西域大國也元駙馬特穆爾既君賽瑪爾堪

又遣其子薩和爾據哈里洪武時賽瑪爾堪及巴什伯里咸朝貢哈里道遠不至二十五年遣官招諭其王賜文綺線幣猶不至二十八年遣給事中傅安郭驥等攜士卒千五百人往為賽瑪爾堪所留不得達三十年又遣北平按察使陳德文等往亦久不還成祖踐阼遣官齎璽書線幣賜其王猶不報命永樂五年安等還德文徧歷諸國說其酋長入貢皆以道遠無至者亦於是年始還德文保昌人采諸方風俗作為歌詩以獻帝嘉之

擢金都御史明年復遣安齋書幣往哈里其酋薩和爾
巴圖爾遣使隨安朝貢七年達京師復命齋賜物偕其
使往報明年其酋遣使朝貢賽瑪爾堪酋哈里者哈里
酋兄子也二人不相能數構兵帝因其使臣還命都指
揮拜額爾欽台齋敕諭之曰天生民而立之君俾各遂
其生朕統御天下一視同仁無間遐邇屢嘗遣使諭爾
爾能虔修職貢撫輯人民安於西徼朕甚嘉之比聞爾
與從子哈里構兵相仇朕為惻然一家之親恩愛相厚

足制外侮親者尚爾乖戾疎者安得協和自今宜休兵
息民保全骨肉共享太平之福因賜綵幣表裏并敕諭
哈里罷兵亦賜綵幣拜額爾欽台既奉使徧詣賽瑪爾
哈喇實哩蘓愛達罕安都呼土魯番火州柳城喀什噶
爾諸國賜之幣帛諭令入朝諸酋長咸喜各遣使偕哈
里使臣貢獅子西馬文豹諸物十一年達京師帝喜御
殿受之犒賜有加自是諸國使臣並皆序哈里於首及
歸命中官李達吏部員外郎陳誠戶部主事李暹指揮

金哈勒巴等送之就齋靈書文綺紗羅布帛諸物分賜其酋十三年達等還哈里諸國復遣使偕來貢文豹西馬及他方物明年再貢及還命陳誠齋書幣報之所過州縣皆宴餞十五年遣使隨誠等來貢明年復貢命李達等報如初十八年偕和闐拔達克山來貢二十年復偕和闐來貢宣德二年其頭目達爾罕額布勒來朝貢馬自仁宗不勤遠畧宣宗承之久不遣使絕域故其貢使亦稀至七年復命中官李貴通西域敕諭哈里酋薩

和爾曰昔朕皇祖太宗文皇帝臨御之日爾等尊事朝廷遣使貢獻始終如一今朕恭膺天命即皇帝位主宰萬方紀元宣德小大政務悉體皇祖奉天恤民一視同仁之心前遣使臣齎書幣往賜道阻而回今已開通特命內臣往諭朕意其益順天心永篤誠好相與還往同為一家俾商旅通行各遂所願不亦美乎因賜以文綺羅錦貴等未至其貢使巴哈哩丹已抵京師卒於館命官致祭有司營葬尋復遣使隨貴貢駝馬玉石明年春

使者歸復命貴護送賜其王及頭目綠幣是年秋及正統三年並來貢英宗幼冲大臣務休息不欲疲中國以事外蕃故遠方通貢者甚少至天順元年復議通西域大臣莫敢言獨忠義衛吏張昭抗疏切諫事乃止七年帝以中夏乂安而遠蕃朝貢不至分遣武臣齎璽書綠幣往諭於是都指揮海榮指揮馬全往哈里然自是來者頗稀即哈里亦不以時貢嘉靖二十六年甘肅巡撫楊博言西域入貢人多宜為限制禮官言祖宗故事惟

哈密每年一貢貢三百人送十一赴京餘留關內有司
供給他若哈里哈桑土魯番天方賽瑪爾堪諸國道經
哈密者或三年五年一貢止送三五十人其存留賞賚
如哈密例頃來濫放入京宜敕邊臣恪遵此例濫放者
罪之制可然是時哈里已久不至嗣後朝貢遂絕其國
在西域最強大王所居城方十餘聖壘石為屋平方若
高臺不用梁柱瓦甍中敞虛空數十間總牖門扉悉雕
刻花文繪以全碧地鋪檀屬無君臣上下男女相聚皆

席地跌坐國人稱其王曰素勒坦猶言君長也男髡首
纏以白布婦女亦白布蒙首僅露雙目上下相呼皆以
名相見止稍屈身初見則屈一足三跪男女皆然食無
匕箸有瓷器以葡萄釀酒交易用銀錢大小三等不禁
私鑄惟輸稅於酋長用印記無印者禁不用市易皆征
稅十二不知斗斛止設權衡無官府但有管事者名曰
達幹亦無刑法即殺人亦止罰錢以姊妹為妻妾居喪
止百日不用棺以布裹屍而葬常於墓間設祭不祭祖

宗亦不祭鬼神惟重拜天之禮無干支朔望每七日為一轉周而復始歲以二月十月為祀齋月晝不飲食至夜乃食周月始茹葷城中築大土室中置一銅器周圍數丈上刻文字如古鼎狀游學者皆聚此若中國太學然有善走者日可三百里有急使傳箭走報俗尚侈靡用度無節土飫饒節候多暖少雨土產白鹽銅鐵金銀琉璃珊瑚琥珀珠翠之屬多有蠶善為紃綺木有桑榆柳槐松檜果有桃李梨葡萄石榴穀有粟麥麻菽獸

有獅豹馬駝牛羊雞犬獅生於阿珠河蘆林中初生日
閉七日始開土人於日閉時取之調習其性稍長則不
可馴矣其旁近安都呼拔達克山並隸其國

安都呼在哈里西北千三百里東南去賽瑪爾堪亦如
之城居大村周十餘里地平衍無險田土膏腴民物繁
庶稱樂土自永樂八年至十四年偕哈里通貢後不復
至

拔達克山在安都呼東北城周十餘里地廣無險阻山

川明秀人物樸茂淳屠數區壯麗如王居西洋西域諸
賈多販鬻其地故民俗富饒初為哈里酋薩和爾之子
所據永樂六年命內官把太李達賜其酋敕書綵幣並
及喀什噶爾格特朗諸部諭以往來通商之意皆即奉
命自是東西萬里行旅無滯十二年陳誠使其國十八
年遣使來貢命陳誠及內官郭敬齋書幣往報天順五
年其王瑪哈穆特遣使來貢明年復貢命使臣鄂博都
哩襲父職為指揮同知

和闐古國名自漢迄宋皆通中國永樂四年遣使來朝貢方物使臣辭歸命指揮新中默桑等齎璽書偕行賜其首織金文綺其首都勒幹伊伯格勒遣使者貢玉璞命指揮尚衡等齎書幣往勞十八年偕哈里拔達克山諸國貢馬命叅政陳誠中官郭敬等報以綵幣二十年貢美玉賜賚有加二十二年貢馬及方物時仁宗初踐阼即宴賚遣還先是永樂時成祖欲遠方萬國無不臣服故西域之使歲歲不絕諸蕃貪中國財帛且利市易

絡繹道途商人率偽稱貢使多攜馬駝玉石聲言進獻
既入關則一切舟車水陸晨昏飲饌之費悉取之有司
郵傳困供億軍民疲轉輸比西歸輒緣道遲留多市貨
物東西數千里間騷然繁費公私上下罔不怨咨廷臣
莫為言天子亦莫之恤也至是給事中黃驥極陳其害
仁宗感其言召禮官呂震責讓之自是不復使西域貢
使亦漸稀和闐自古為大國隋唐間侵并戎盧杆彌渠
勒皮山諸國其地益大南距蔥嶺二百餘里東北去嘉

峪關六千三百里大畧蔥嶺以南賽瑪爾堪最大以北
於闐最大元末時其主暗弱鄰國交侵人民僅萬計悉
避居山谷生理蕭條永樂中西域憚天子威靈咸修職
貢不敢擅相攻和闐始獲休息漸行賈諸蕃復致富庶
桑麻黍禾宛然中土其國東有白玉河西有綠玉河又
西有黑玉河源皆出崑崙山土人夜視月光盛處入水
採之必得美玉其隣國亦多竊取來獻迄萬厯朝和闐
亦間入貢

實喇蘓近賽瑪爾堪永樂十一年遣使偕哈里愛達罕
喀什噶爾等八國隨拜額爾欽台八貢方物命李達陳
誠等齎敕偕其使往勞十三年冬其酋額布勒津遣使
隨達等朝貢天子方北巡至明年夏始辭還復命誠偕
中官魯安齎敕及白金線緞紗羅布帛賜其酋十七年
遣使偕伊蘓布哈諸部貢獅子文豹名馬辭還復命安
等送之賜其酋絨錦文綺紗羅玉繫腰磁器諸物時車
駕頻歲北征乏馬遣官多齎線幣磁器市之實喇蘓及

賽瑪爾堪諸國其酋即遣使貢馬以二十一年八月謁
帝於宣府之行宮厚賜之遣還京師其人遂久留內地
不去仁宗嗣位趣之還乃辭去宣德二年貢駝馬方物
授其使臣阿里為都指揮僉事賜誥命冠帶嗣後久不
貢成化十九年與赫魯賽瑪爾堪巴達實諸國其貢獅
子詔加優賚弘治五年哈密忠順王善巴襲封歸國與
隣境伊瑪格爾酋結婚賽喇蘇酋念其貧偕旁國額布
勒津之酋率其平章蒙古卜台知院孟克各遣人請頒

賜財物助之成婚朝議義之厚賜善巴并賜二國及其
平章知院綵幣嘉靖三年與旁近三十二部並遣使貢
馬及方物其使者各乞蟒衣膝襴磁器布帛天子不能
却量子之自是貢使亦不至

愛達罕西域小部落元太祖盡平西域封子弟為王鎮
之其小者則設官置戍同於內地元亡各自割據不相
統屬洪武永樂間數遣人招諭稍稍來貢地大者稱國
小者止稱地面迄宣德朝效臣職奉表箋稽首闕下者

多至七八十部而愛達罕則永樂十一年與哈里並貢者也迨十四年魯安等使哈里實喇蘓諸國復便道賜其酋長文綺然地小不能常貢後竟不至

喀什噶爾亦西域小部落永樂六年巴爾台李達等齎敕往賜即奉命十一年遣使隨拜額爾欽台入朝貢方物宣德時亦來朝貢天順七年命指揮劉福普賢使其地其貢使亦不能常至

伊蘓布哈地近愛達罕永樂十四年使安都呼賽瑪爾

堪者道經其地賜其酋文綺諸物十七年偕隣國實喇
蘇共貢獅豹西馬賚白金鈔幣使臣辭還命魯安等送
之有瑪哈穆特者願留京師從其請成化十九年與賽
瑪爾堪共貢獅子名馬番刀兜羅鎖幅諸物賜賚有加
先是宣德六年有伊蘇布哈遣使臣密爾阿里朝貢或
云即伊蘇布哈

呼爾察國微弱四圍皆山鮮草木水流曲折亦無魚蝦
城僅里許悉土屋酋所居亦卑陋俗敬僧永樂十四年

遣使朝貢命所經地皆禮待弘治五年其地回回帕羅
勒溫等由海道貢玻璃瑪瑙諸物孝宗不納賜道里費
遣還

奇爾瑪勒永樂中遣使來貢惟獸皮鳥羽屬褐其俗喜
射獵不事耕農西南傍海東北林莽深密多猛獸毒蟲
有達巷無市肆交易用鐵錢

博斯和勒舊名舒克瑪喇勒嘗有白虎出松林中不傷
人亦不食他獸旬日後不復見國人異之稱為神虎曰

此西方白虎所降精也因改國名其地無大山亦不生樹木無毒蟲猛獸之害然物產甚薄永樂中嘗入貢

達爾瑪服屬賽瑪爾堪居海中地不百里人不滿千家無城郭上下皆居板屋知耕植有毛褐布縷馬駝牛羊刑止簞朴交易皆用銀錢永樂中遣使朝貢賜大統歷及文綺藥茶諸物

納實哲干東去實喇蘓數日程皆舟行城東平原饒水草宜畜牧馬有數種最小者高不過三尺俗重僧所至

必供飲食然好氣健鬪鬪不勝者衆嗤之永樂中遣使朝貢使臣還厯河北轉關中抵甘肅有司皆置宴

密珍城永樂中來貢其國地廣多高山日中為市諸貨駢集貴中國磁漆器產異香駝馬

日羅國永樂中來貢弘治元年其王伊實干達爾魯密德哩雅復貢使臣奏求紵絲夏布磁器詔皆予之

密實爾一名密色爾永樂中遣使朝貢既宴賚命五日一給酒饌果餌所經地皆置宴正統六年王索勒坦阿

實拉呼復來貢禮官言其地極遠未有賜例昔賽瑪爾
堪初貢時賜予過優今宜稍損賜王綵幣十表裏紗羅
各三匹白縐絲布白將樂布各五匹洗白布二十匹王
妻及使臣遞減從之自後不復至

赫嚕近賽瑪爾堪世為婚姻其地山川草木禽獸皆黑
男女亦然宣德七年遣使來朝貢方物正德二年其王
薩和爾索勒坦遣指揮哈濟瑪哈穆特奉貢命齎敕及
金織紵絲線絹歸賜其王六年復來貢景泰四年偕隣

境三十一部男婦百餘人貢馬二百四十有七騾十二
驢十駝七及玉石硃砂鑛鐵刀諸物天順七年旺默色
亦遣指揮僉事瑪哈穆特實爾巴勒等奉貢賜綵幣表
裏紵絲襲衣擢其使臣為指揮同知從者七人俱為所
鎮撫成化十九年與實喇蘓賽瑪爾堪巴達實共貢獅
子巴達實之長亦稱素勒坦瑪哈穆特景泰七年嘗入貢
至是復偕至弘治三年又與天方諸國貢駝馬玉石
托喇思地小周徑不百里城近山山下有水赤色望之

如火俗佞佛婦人主家栖產牛羊馬駝有布縷毛褐土
宜糴麥無稻交易用錢宣德六年入貢明年命中官李
貴齎璽書獎勞賜文綺線帛以地小不能常貢

阿蘓近天方賽瑪爾堪幅員甚廣城倚山面川南流
入海有魚鹽之利土宜耕牧敬佛畏神好施惡鬪物產
富寒暄適節人無飢寒夜解寇盜雅稱樂土永樂十七
年其酋雅固沙遣使貢馬及方物宴賚如制以地遠不
能常貢天順七年命都指揮白全等使其國竟不復再

貢

薩和爾在阿蘓西海島中永樂中遣七十七人來貢日
給酒饌果餌異於他國其地山川環抱饒畜產人性樸
直恥鬪好佛王及臣僚處城中庶人悉處城外海產奇
物西域賈人以輕直市之其國人不能識

天方古筠冲地一名天堂又曰穆齊水道自和爾默蘓
四十日始至自呼哩西南行三月始至其貢使多從陸
道入嘉峪關宣德五年鄭和使西洋分遣其儕詣呼哩

聞呼哩遣人往天方因使人齎貨物附其舟偕行往返
經歲市奇珍異寶及麒麟獅子駝雞以歸其國王亦遣
陪臣隨朝使來貢宣宗喜賜賚有加正統元年始命附
瓜哇貢舟還賜幣及勅獎其王六年王遣子賽音德勒
阿里與使臣賽音德勒哈桑珍寶來貢陸行至哈里遇
賊殺使臣傷其子右手盡劫貢物以去命守臣察治之
成化二十三年其國中回回阿里以兄納德游中土四
十餘載欲往雲南訪求乃攜寶物鉅萬至滿剌加附行

人左輔舟將入京進貢抵廣東為市舶中官韋眷侵尅
阿里怨赴京自訴禮官請估其貢物酬其直許訪兄於
雲南時眷懼罪先已賁緣於內帝乃責阿里為間諜假
貢行奸令廣東守臣逐還阿里乃號泣而去弘治三年
其王蘇勒坦阿哈瑪特遣使偕賽瑪爾堪土魯番貢馬駝
玉石正德初帝從御馬太監谷大用言令甘肅守臣訪
求諸番騾馬驢馬番使云善馬出天方守臣因請諭諸
番貢使傳達其王俾以入貢兵部尚書劉宇希中官指

議令守臣善擇使者與通事親詣諸番曉諭從之十三年王賽音布拉克遣使貢馬駝梭幅珊瑚寶石魚牙刀諸物詔賜蟒龍金織衣及麝香金銀器嘉靖四年其王伊瑪都爾等遣使貢馬駝方物禮官言西人來貢陝西行都司稽留半年以上始為具奏所進玉石悉粗惡而使臣所私貨皆良乞下按臣廉問自今毋得多攜玉石煩擾道途其貢物不堪者治都司官罪從之明年其國額穆都喀等八王各遣使貢玉石主客郎中陳九川簡

退其粗惡者使臣怨通事胡士紳亦憾九川因詐為使臣奏詞誣九川盜玉坐下詔獄拷訊尚書席書給事中解一貫等論救不聽竟戍邊十一年遣使偕土魯番賽瑪爾堪哈密諸國來貢稱王者至三十七人禮官舊制惟哈密與朵顏三衛比歲一貢貢不過三百人三衛地近盡許入都哈密則十遣其二餘留待於邊若西域則越在萬里素非屬國難視三衛貢期而所遣使人倍踰恒數番文至二百餘通皆以索取叛人伊蘭為詞竊恐

託詞窺伺以覘朝廷處分邊臣不遵明例概行起送有乖法體乞下督撫諸臣遇諸番人入貢分別存留起送不得概遣入京且嚴飭邊吏毋避禍目前貽患異日貪納款之虛名忘禦邊之實策帝可其奏故事諸番貢物至邊臣驗上其籍禮官為按籍給賜籍所不載許自行貿易貢使既竣即有餘貲責令攜歸願入官者禮官奏聞給鈔正德末黔番猾胥交關罔利始有貿易餘貲令市僧評直官給正鈔之例至是天方及土魯番使臣其

籍餘玉石銚刀諸貨固求準貢物給賞禮官不得已以正德間例為請許之番使多賈人來輒挾重貨與中國市邊吏嗜賄侵剋多端類取償於公家或不當其直則咆哮不止是歲貢使皆黠悍既習知中國情且憾邊吏之侵剋也屢訴之禮官却不問鎮守甘肅中官陳浩者當番使入貢時令家奴王洪多索名馬玉石諸物使臣憾之一日遇洪於衢即執詣官以証實其事禮官言事關國體須大有處分以服遠人之心乃命三法司錦衣

衛及給事中各遣官一員赴甘肅按治洪迄獲罪十七
年復貢其使臣請游覽中土禮官疑有狡心以非故事
格之二十二年偕賽瑪爾堪土魯番哈密噶默特諸國
貢馬及方物後五六年一貢迄萬厯中不絕天方於西
域為大國四時常似夏無雨電霜雪惟露最濃草木皆
資之長養土沃饒粟麥黑黍人皆頎碩男子削髮以布
纏之婦女則編髮蓋頭不露其面相傳回回設教之祖
曰瑪哈穆特者首於此地行教死即葬焉墓頂常有光

日夜不熄後人遵其教久而不衰故人皆向善國無苛
擾亦無刑罰上下安和寇賊不作西土稱為樂國俗禁
酒有禮拜寺月初生其王及臣民咸拜天號呼稱揚以
為禮寺分四方每方九十間共三百六十間皆白玉為
柱黃甘玉為地其堂以五色石砌成四方平頂內用沉
香大木為梁凡五又以黃金為閣堂中垣墉悉以薔薇
露龍涎香和土為之守門以二黑獅堂左有司馬儀墓
其國稱為聖人塚土悉寶石圍牆則黃甘玉兩旁有諸

祖師傳法之堂亦以石築成俱極其壯麗其崇奉回回教如此瓜果諸畜咸如中國西瓜甘瓜有一人不能舉者桃有重四五觔者雞鴨重有十餘觔者皆諸番所無也瑪哈穆特墓後有一井水清而甘泛海者必汲以行遇颶風取水灑之即息當鄭和使西洋時傳其風物如此其後稱王者至二三十人其俗亦漸不如初矣

默德訥回回祖國也地近天方宣德時其酋長遣使偕天方使臣來貢後不復至相傳其初國王瑪哈穆特生

而神靈盡臣服西域諸國諸國尊為布按諾爾猶言天使也國中有經三十本凡三千六百餘段其書旁行兼篆草楷三體西洋諸國皆用之其教以事天為主而無像設每日西向虔拜每歲齋戒一月沐浴更衣居必易常處隋開皇中其國薩阿巴薩阿迪幹格斯始傳其教入中國迄元世其人徧於四方皆守教不替國中城池宮室市肆田園大類中土有陰陽星厯醫藥音樂諸技其織文製器尤巧寒暑應候民殷物繁五穀六畜咸備

俗重殺不食豬肉嘗以白布蒙頭雖適他邦亦不易其俗

坤城西域回回種宣德五年其使臣者珠瑪爾丹等來朝貢駝馬時有聞中之令使者即輸米一萬六千七百石於京倉中鹽及辭還願以所納米獻官帝曰回人善營利雖名朝貢實圖貿易可酬以直於是予帛四十匹布倍之其後亦嘗貢自成祖以武定天下欲威制萬方遣使四出招徠由是西域大小諸國莫不稽顙稱臣獻

琛恐後又北窮沙漠南極冥海東西抵日出沒之處凡
舟車可至者無所不屈自是殊方異域鳥言侏儒之使
幅輳闕廷歲時頒賜庫藏為虛而四方奇珍異寶名禽
殊獸進獻上方者亦日增月盛蓋兼漢唐之盛而有之
百王所莫並也餘威及於後嗣宣德正統朝猶多重譯
而至然仁宗不務遠畧踐阼之初即撤西洋取寶之船停
松花江造舟之後召西域使臣還京敕之歸國不欲疲
中土以奉遠人宣德繼之雖間一遣使尋亦停止以故

邊隅獲休息焉今來故蹟嘗奉貢通名天朝者曰阿繼
曰哈里爾曰沙達瑪曰哈達勒曰薩蘭曰默克埒曰巴
哩輝曰阿里瑪曰托和瑪曰察克拉實曰幹拉實曰布
哈爾曰帕勒曰聶薩固爾曰克實密爾曰特博哩蘓曰
和坦曰和珍曰固紳曰雅克實曰雅爾噶曰榮曰伯曰
烏蘭曰阿敦曰實實城曰色格曰巴延曰克勒恰二十
九部以疆域褊小止稱地面與哈里哈實噶爾薩蘭伊
埒巴勒實喇斯實喇哈雅阿蘓巴丹皆由哈密入嘉峪

關或三年五年一貢入京者不得過三十五人其不由
哈密者更有奇爾瑪勒密爾哈蘭克托伽拉珠葉迪干
拉珠額布勒英格實密奇爾濟蘓伊聶蘓哈勒津十一
地面亦皆通貢

噶默特去中國絕遠嘉靖三年遣使貢獅子西牛給事
中鄭一鵬言噶默特非嘗貢之邦獅子非可育之獸請
却之以光聖德禮官席書等言噶默特不列王會其真
偽不可知近土魯番數侵甘肅而邊吏於噶默特冊內

察有土魯番之人其狡詐明甚請遣之出關治所獲間
謀罪帝竟納之而令邊臣察治五年冬復以二物來貢
既頒賜其使臣言長途跋涉費至二萬二千餘金請加
賜御史張祿言華夷異方人物異姓留人養畜不惟違
物抑且拂人况養獅日用二羊養西牛日用果餌獸相
食與食人食聖賢皆惡之又調御人後日需供億以光
祿有限之財充人獸無益之費殊為拂經迄返其人却
其物薄其賞明中國聖人不貴異物之意不納乃從禮

官言如弘治賽瑪爾堪例益之二十二年偕天方諸國
貢馬及方物明年還至甘州會迤北賊入寇總兵官楊
信令貢使九十餘人往禦死者九人帝聞禱信職命有
司禮敬歸其喪二十七年三十三年並入貢其貢物有
珊瑚琥珀金剛鑽花瓷罷鎖服撒哈刺帳羚羊角西狗
皮捨列獬皮鐵角皮之屬

明史卷三百三十二

欽定四庫全書

明史卷三百三十二考證

賽瑪爾堪傳特穆爾首遣回回滿拉克巴斯等來朝貢
馬十五駝二臣方煒按識大錄云來朝貢馬駝及
海青傳僅言貢馬駝謹識

賽瑪爾堪傳特穆爾貢馬二百臣方煒按貢馬二百
考識大錄作千二百匹與傳互異謹識

賽瑪爾堪傳特穆爾死其孫哈里嗣乃遣使臣呼岱達

等送安還

臣

方煒按傳安二十八年至其國被留

至永樂五年還考識大錄云永樂七年陳誠至其國不入貢上使禮科都給事中傅安與御史姚臣往征之以官軍千五百人往賽瑪爾堪怒拘留安等至洪熙元年王乃奉表入貢送安歸與傳所載互異謹識賽瑪爾堪傳獨巡按御史陳瑤論其糜費煩擾請勿納禮官議如其言

臣

方煒按禮官復言入貢從甘肅

涉海而來則勘合印信皆屬虛文矣抑臣慮其習知

海道而生意外之變望遣行人勅諭國王自此貢從
故道入語詳識大錄謹識

賽瑪爾堪傳十一年偕天方土魯番入貢 臣方煒按

本紀云嘉靖八年賽瑪爾堪入貢傳未之載謹識

賽瑪爾堪傳工巧過於哈里 臣方煒按識大錄云賽

瑪爾堪在哈里東謹識

巴什伯里傳巴什伯里西域大國也 臣方煒按識大

錄云伯實巴里在沙州西去肅州西北三千七百餘

里謹識

巴什伯里傳宣德元年帝嘉其尊事朝廷遣使賜之鈔

幣

臣

方煒按識大錄云更國號曰伊埒巴爾時烏

蘇又與其子薩圖治兵相攻宣宗勅示以教育子孫之道傳未之載謹識

巴什伯里傳尋復遣使隨貴貢駝馬玉石

臣

方煒按

貢駝馬玉石考識大錄係正統二年事與傳互異謹

識

巴什伯里傳居喪止百日不用棺

臣

方煒按皇興考

云哈里其俗服色尚白喪事易青飾壁以金銀傳未
之載謹識

拔達克山傳浮屠數區壯麗如王居

臣

方煒按回部

向不崇信佛教傳云浮屠數區及卷內呼爾察等傳
所載敬僧重僧云云並係沿誤蓋是時西域諸國不
過羈縻或遣使招致故所言城郭風俗大半得之傳
聞未為核實我

朝德威廣被自葱嶺逾拔達克山盡入版圖土俗山川
瞭如指掌始知水經注及西域諸書所載敬佛諸語
概不足信但原文未能徧改謹於初見處識其誤

和闐傳遣使者貢玉璞 臣方燁按貢玉璞考識大錄
係永樂七年事謹識

和闐傳命叅政陳誠中官郭敬等報以綵幣 臣方燁
按識大錄云永樂十二年陳誠至其國傳未之載謹
識

赫魯傳其地山川草木禽獸皆黑男女亦然
臣方煒

按其地山川草木禽獸皆黑男女亦然語近傳會黑
婁乃譯音並非中國語也謹附訂於此

托喇傳有布縷毛褐
臣方煒按獻徵錄托喇斯之地

人盡以雜布為衣傳未之載謹識

阿蘇傳其酋雅固沙遣使貢馬及方物
臣方煒按遣

使貢馬時共百二十人來朝詳獻徵錄謹識

薩和爾傳遣七十七人來貢
臣方煒按七十七人考

獻徵作七十二人謹識

天方傳天方古筠冲地

臣方煒按獻徵錄有學校及

將軍巧曹叅軍州郡縣諸官傳未之載謹識

天方傳王亦遣陪臣隨朝使來貢

臣方煒按識大錄

云宣德七年國王以獅子麒麟貢傳未之載謹識

天方傳嘉靖四年其王伊瑪都爾等遣使貢馬駝方物

臣方煒按本紀云嘉靖二年及八年天方入貢傳

未之載謹識

天方傳每方九十間

臣方煒按識大錄寺每方九十

間層次如塔中有黑石方丈餘曰漢初天降也謹識

默德訥傳其織文製器尤巧

臣方煒按識大錄云其

俗並工雕鏤謹識

嚕默特傳遣使貢獅子西牛

臣方煒按嘉靖三年嚕

默特所貢尚有西狗西馬珊瑚珠玉等物不僅獅子

西牛二物也詳識大錄謹識

明史卷三百三十二考證